

այդ սովորութիւնից:... Ժողովը նպատակայարմար համարեց՝ մի յանձնաժողով ընտրել, որ գործակալ վարդապետի նախագահութեամբ՝ հաղեմասու և առհասարակ զիւղական նշանադրութեան ու հարսանիքի վերաբերեալ այլ տղեղ սովորութիւններն ու շուայլ ծախքերը արմատախիլ անելու և չափաւորելու համար՝ մանրամասն ծրագիր ու պարտագիր կանոններ կազմէ և ներկայացնէ հետեւեալ քահանայական ժողովին»¹⁾:

Սօսք չկայ, որ այդպիսի պայմաններում շատ ծանր է լինում այն աղջկայ դրութիւնը, որը մօտենում է ամուսնական հասակին: Կարծես, ժողովրդի մէջ ամենքն էլ զգում են այդ. բայց և այնպէս՝ հաշտւում են իրականութեան հետ, հաշտւում են հարս գնելու գաղափարի հետ, հետեւելով ու հաւատարիմ մնալով «պապերի աղաթին»: Մանաւանդ զգում են իրենց այդ անմխիթար վիճակը հէնց իրենք կանայք. նոքա զգում են, թէ իրենք առարկայ են և դրուած են ասպարիզի վրայ սակարկութեան ու վաճառքի համար: Եւ նոցա այդ հոգեկան դրութիւնն արտայայտւում է միմիայն այն երգերում, որոնց մէջ հայ գեղջիկուհին գիտէ մեկամաղձիկ ու ազատօրէն իւր ցաւերը հնչեցնել: Բուլանըլում, նմանապէս և Զաւախքում, երբ հարսին զարգարում են հարսանիքի ու պսակադրութեան խորհրդի համար, կանանց մասում միշտ երգում են հետեւեալ բնորոշ տողերը, որոնք պարզ ցոյց են տալիս թէ կանանց ճակատագիրը որոշւում է առեւտուրով՝ գնմամբ.

Զհէրիկ խարեցին կուռէ մէ գինով,

Զմէրիկ խարեցին թոփիկ մէ շիւով,

Զաղբէր խարեցին ջուխտակ մէ ջգմով,

Զքուրիկ խարեցին մատիկ մէ հինով.

Զգրամի հանգուրձ արձըկեցին՝

Զաղջիկ մամուց ջոկեցին²⁾:

¹⁾ «Մշակ», 1902 թ. № 149.

²⁾ Բենսէ—Բուլանըլ՝ Ազգագրական Հանդէս 1899 թ. գիրք Ե. հատ Ե. Լալայեան—Զաւախք, եր. 141.